

渦陽風土記卷十一

渦陽縣知事葉縣黃佩蘭撰

禮俗

記曰禮不下庶人蓋謂君子隆禮小人由禮非謂不足與於禮之數也先聖治神人和上下行之以禮以馴至於盜竊亂賊之不作刑措而不用凡以爲庶人而已矣以庶人爲不足與於禮之數而國家之大典人道之大防吝以曉然播告於天下聽其冥趨而後恃刑法以刳之人也而致之禽生也而致之死是罔民也焉有仁人而忍出此昔姬公致成周之太平乃六官經制大備而獨以周禮名書其

渦陽風土記卷十一

禮俗

一

故何哉蓋民受天地之中以生皆有喜怒哀樂之情飲食男女聲色安逸之欲聖人制度原情而爲之節因事而爲之防大而郊廟朝廷小而日用食息周旋禘襲之文靡不有規矩準繩以消融其淫慝而恢宏其情氣迨入之既深相待如賓而禮行於耕耨矣獻豸於公而禮行於田獵矣執榼承飲免冑趨風而禮行於行陣矣王者以人情爲田烏在其不下庶人也易曰天澤履君子以辨上下定民志孔子曰以禮讓爲國乎何有今民志不定國人羣焉相爭以釀禍亂欲以己之舍禮何以乎考歷代典禮率詳於宮廟而畧於士庶中華民國初元各種禮服及遇喪左腕圍

紗之制雖經公布概簡畧不厭人心完全禮制經明令交
禮制館考徵損益採輯編纂然公布尙待時日夫禮猶體
也斯須不可去身古鄉先生悲禮樂之崩壞往往編纂成
書楷模後進孔子教孺悲以士喪禮及近代婺源朱子家
禮其非循時王之律令也明矣茲採立縣以來人民所共
由及習聞習見者著之於篇俾隆禮君子得觀省焉

古通禮蜡祭之類靡得而紀矣設縣後有宣講之禮清因
明制凡朔月月半選年高行謹通文者八人司鐸以令士
民於明倫堂設聖牌左右設講位皆高座州縣文武教職
官均朝服州人士大夫公服軍民齊集各官列位就拜位

渦陽風土記卷十

禮俗

二

行禮畢坐地聽宣講聖諭廣訓各大鄉村擇寬閑靜地會
集以舉貢生員內老成有學行者爲約正樸實謹守者爲
值月耆老里長咸會宣講聖諭推說其義未達者質問農
忙月及歲暮停會講縣行不盡如儀宣統元年巡撫朱家
寶嘗派員來縣宣講縣人何文彬王化光與焉今鄉村猶
有行之者儀則畧矣

鄉飲酒之禮清因明制以正歲月半孟冬朔日行禮於學
其儀盡依禮經所有賓介皆鄉人齒德重望也司正舉觶
揚言曰恭惟朝廷率有舊章敦崇禮教舉行鄉飲非爲飲
食凡我長幼各相勉勵爲臣盡忠爲子盡孝長幼有序兄

友弟恭內睦宗族外和鄉里無或廢墜以忝所生讀畢立飲遂讀律令大誥詞曰鄉飲酒禮序長幼論賢良別姦頑異罪人其坐席高年有德者居於上高年淳篤者並之以次序齒而列其有曾違條犯法之人不許干與善良之席主者若不分別至使貴賤混淆察知或發覺以違制論姦頑紊亂正席者全家移化外讀畢復位歷代律令諄諄以姦頑干席爲戒豈非務名好勢官吏與鄉人有交相受過者與故鄉賢之祀既輕鄉實之望不孚而禮寢廢矣

賓與之禮科舉諸生雲集縣署縣官與儒學東西諸生以次坐酒五行或十行送至郊外國體既革禮不行中華紀

元則有

慶節之禮凡國慶日地方長官率所屬軍民詣國旗行三鞠躬禮元旦亦如之

祭禮舊有

城隍廟易城復于隍其義甚古清春秋無祭守土長官朔望上香行三跪九叩禮今惟愚夫愚婦祈禱報賽而已

先農壇歲以仲春亥日承祭官禮服陳劍一籃籩四邊豆八羊一豕一帛一尊一爵三禮成率所屬耆老農夫行耕

籍禮

神祇壇祭風雲雷雨及境內山川之神

社稷壇木主二一縣社之神一縣稷之神以春秋仲月上
戊日承祭各官行三跪九叩禮

邑厲壇每歲以清明節七月望十月朔日守土官詣城隍
廟上香以祭厲告至期請城隍廟神位入壇設於正中張
榜祭鬼神無祀者蒙城以明正德六年流寇屠城奏准加
四月初十日一祭清咸同之亂殺人盈野新鬼故鬼不其
餒而祭品羊三豕三米飯三石尊酒楮帛承祭官行一跪
三叩禮祭畢仍奉城隍神位還廟

文昌廟祠戴筐六星或曰蜀人科舉時禋祀極盛境內鄉
集多有之

張村舖祠在集東南隅今廢夏肥河北有文昌
壇南陽王佩箴文昌帝君壇碑文曰國家懷柔

渦陽風土記卷十一

禮俗

四

百神貓虎埔坊之微皆崇而祀之別夫孝友聖神見靈爽
爲徵驗天下無賢不肖靡不收攝其心志以共趨於日新
富有之途視捍患禦災者爲尤盛其應於秩宗之法典也
固宜文昌之祭唐宋皆應祀典元用道士說弘爲帝君神
應天象或曰人鬼改革以來羣祀不復領於祠官梓潼之
祀忽諸獨世所傳誦帝君陰騭文者猶足概一世之人心
而激發其堅苦向善之志江淮間時祀之墟父故城之
南當譙沛交爲中原要呂南襟夏肥章華臺北明水乾谿
左右翼佩其民率駢麟好義以不利於物爲大恥父召其
子兄勉其弟於帝君之言蓋身體而力行之每公家有
興作則裹糧荷鍤以赴期會甘淡薄忍勞瘁事成口不言
功暇日又本此意以勸導鄉氓而同善之會實風行於毫
太洞阜間以視溝猶之倫咕驛編摩以僥倖司祿庇佑者
其功力爲尤劬於以見人性皆善而帝君鼓舞之靈不綦
神哉記載大道之行人人不獨親其親子其子貨惡其棄
於地也不必私於己力惡其不出於身也不必爲己充斯
義也共和國民之德其庶矣乎朱子曰善人質美而未學
者也蒞斯會者誠能永終知弊更誌之以學修俾陶宏景
杜光庭袁桷之儔尸其功而不復任其過以仰荷帝君之
庥命則雖掃地以祭明德惟馨矣舊有帝君祠燬於兵今

同善會修廢而崇禮亦宜之爰爲神絃曲二闋俾祝史歌而肄焉詞曰陽和布其大雲兮去天尺五繫皖公之遺黎兮離高邱而審處世長蛇而不驚兮揮五丁之神斧惟神光之照臨兮實司天之六府六府修而神歆兮騎白龍而延佇揚楸燎兮擊土鼓無小無大兮迴波舞鸕鷀杓兮鱗鱗誰其尸之兮荷今之剛主右迎神溪藻潔兮辰良莫桂酒兮椒漿鈞天張野兮神人和而趨滄帝受姓於張兮張我楚邦開我將星兮彎石弓而射天狼帝柄奚指兮在水一方鎮淮渦之無支祁兮道龍湫而湯湯矧夏肥之鹽蜃兮作文星之光芒化僑野爲瓌雅兮炳睢溪之文章勿俾帝歸兮福此淮鄉荃旣憐余之好修兮終翩然其來荆右送神

僧忠親王祠果敏公英翰祠清勅於立功省分建立專祠有司春秋致祭今名二公祠

華祖廟祀後漢華佗馬忠武微時曾示靈異療忠武痼疾邑人崇奉尤虔

渦陽風上記卷十一

禮俗

五

泣杖祠在義門集祀漢孝子韓伯俞清禮部頒賜祭文

以上祠祀之未見明令者又有龍王廟劉猛將軍廟舊無廟址故不著於篇夫祀有其廢之莫敢舉也顧準諸天理人心與方今時會之所趨縣城究不可無陳隱王祠義門集亦不可無張睢陽祠也英靈不昧民氣斯張議禮君子當不河漢斯言也

其已奉明令者

孔子廟舊名文廟立縣後寄祀於義正書院文廟落成清末升爲大祀禮樂器數文物未能備具中華紀元二年更定祀孔典禮頒行各縣升降俯仰之餘猶得識先王禮器

焉文多不及備載定名曰孔子廟大成殿正位祀至聖孔子以四配十二哲配饗以先賢公孫氏以下七十九人先儒公羊以下七十一人從祀

四配位次

東配 復聖顏子 述聖子思

西配 宗聖曾子 亞聖孟子

十二哲位次

東哲 先賢閔子 冉子 端木子 仲子 卜子 有子

西哲 先賢冉子 宰子 冉子 言子 顓孫子 朱子

兩廡位次

渦陽風土記卷十一

禮俗

六

東廡先賢

公孫僑 林放 原憲 南宮适 商瞿 漆雕開
司馬耕 梁鱣 冉儒 伯虔 冉季 漆雕徒父

漆雕哆 公西赤 任不齊 公良儒 公肩定

鄒車 罕父黑 榮旂 左人郢 鄭國

原亢 廉潔 叔仲會 公西蠆如 邾異

陳亢 琴張 步叔乘 秦非 顏曾

顏何 縣亶 牧皮 樂正克 萬章

周敦頤 程顥 邵雍 公治長 公皙哀

蘧瑗 澹臺滅明 宓不齊 公冶長 顏幸

高柴 樊須 商澤 巫馬施 顏祖

曹卹 公孫龍 秦商 顏高 樂祖

石作蜀 公夏首 后處 顏之僕 施之常

句井疆 秦祖縣成 公祖句茲 燕伋 公都子

狄黑 孔忠 公西葳 顏之僕 公都子

申枏 左邱明 秦冉 公明儀 公都子

公孫丑 張載 程頤 許慎

公羊高 伏勝 毛亨 許慎

鄭康成 范甯 陸費 陸九淵

謝良佐 羅從彥 李綱 張栻 陳淳

真德秀 何基 文天祥 趙復 金履祥

東廡先儒 后蒼 司馬光

陳淳

西廡先儒

陳澥 呂枋 穀梁赤 杜子春 韓琦 李侗 魏了翁 曹端 黃道周

方孝儒 劉宗周 高堂生 諸葛亮 楊時 呂祖謙 王柏 陳獻章 陸世儀

薛瑄 孫奇逢 董仲舒 王通 游酢 袁燮 陸秀夫 蔡清 湯斌

胡居仁 張履祥 劉德 韓愈 尹焞 黃幹 許衡 王守仁 李塨

羅欽順 陸隴其 毛萇 胡瑗 胡安國 輔廣 吳澄 呂坤 顏元

張伯行 蔡沈 許謙

崇聖祠崇祀孔子五代

肇聖王金木公 裕聖王祈父公

東配 先賢孔氏孟皮 顏氏無繇 孔氏鯉

西配 曾氏皙 孟氏激

先儒周氏輔成 程氏珦 蔡氏元定

渦陽風土記卷十一

禮俗

七

先儒張氏廸 宋氏松從祀東西廡

以春秋上丁縣知視祀孔如祀天儀

鄉賢名宦節孝忠義舊附祀於孔廟儀門東西偏室考清代鄉賢須禮臣題奏請旨慎重不易入祀渦因四縣舊檔各祠俱供神牌後被兵燬廢現正議修復

關岳祀中華紀元四年定為關岳合祀縣舊無岳王廟暫祠於城內關壯繆廟殿正位左奉關壯繆侯右奉岳忠武

王兩序奉歷代忠武將士張飛 王濬 韓擒虎 李靖

蘇定方 郭子儀 曹彬 韓世忠 旭烈兀 徐達

馮勝 戚繼光東位西嚮 趙雲 謝玄 賀若弼 尉

遲敬德 李光弼 王彥章 狄青 劉錡 郭侃 常
遇春 藍玉 周遇吉西位東嚮均北上歲以春秋分節
氣後第一戊日特行崇典以地方長官主祭
其民間祭禮士夫有家廟者春清明節冬十月一日設饌
質明行事用三獻禮族長主祭然多爲通族合祀其四時
令節冥壽忌日各有常祭於寢其祠堂圖神主尺式墓祭
焚香尙遵守朱子家禮

婚姻不論財髻齡通媒妁用釵環首飾數件俗曰下定豐
儉視家貲納吉請期親迎者少新婦卽日廟見拜舅姑亦
有至三日者擇日婿見婦之父母其遲又久者率拘於時
日禁忌云

喪禮初喪含殮棺衾畧如家禮三日成服戚友來奠俗稱
送三舉殯以啟報聞祭日題主致祭與祭者各送胙肉至
親祭筵用旗幟豬羊果蔬有賻者發引親友各備香酒果
蔬路祭相送至塋所貧家隨日致弔

宴會長老生辰主人先拜祖先舉家以次拜祝戚友釀貲
稱觴或製錦幃爲祝至親別具衣帽靴鞋襪酒果等物餘
以酒麪果爲率生子三朝後外家送衣衫褥被首飾彌月
及週歲咸有饋遺以上主人多設席謝惟用雞豚魚麪數
器近亦漸豐侈山海珍異往往而有城中包辦館肆一筵

恒至十數千

若夫歲時令節間巷習慣次其概畧以供採錄亦記風土者所有事也元旦設香燭男女禮服拜神祇祖先序拜尊長男子則出拜宗族親隣謂之賀歲各家食餽飽具酒食相款立春先一日有司設土牛以綵仗迎入城祭芒神各家作春盤春餅飲春酒元宵士女邀天仙或紫姑神問時歲吉凶作燈市火樹鑼鼓嬉遊達旦二月二日布灰庭前謂之圍倉清明日各家赴墳塋添土焚紙錢具牲醴墓祭戶各插柳或簪於首士女攜酒遊郊外謂之踏青端午日取菖蒲及艾插門戶或繫以五色絲繩佩於小兒之身飲

渦陽風土記卷十

禮俗

九

雄黃酒又以塗小兒耳鼻親友各以角黍相饋送六月六日曝書畫衣服七夕夜婦女陳瓜果乞巧中元祭掃先塋中秋夜各家置瓜果醴餅夕月酒宴至夜分乃止重陽日宴賞籬菊登高觀望爲樂十月一日祭掃先塋如清明儀臘月二十四日各家拂塵掃舍其夜祀竈又曰官祭三民祭四歲除前一二日各家修菓餅送親友謂之饋歲除日換桃符寫春聯易門神謂之從新是夜各以牲醴祀神謂之送殘年又明燭燒香熾炭燔柴圍爐環坐謂之守歲五更放爆竹燔蒼朮辟瘟丹謂之辟邪

按漢書地理志曰沛之民猶有先生遺風厚重多君子好

稼穡惡衣服以致蓄藏清統志■州民淳訟簡而物產美
土厚水甘而風俗和里巷敦扶持之教男女別飲食之筵
府志云士勵詩書民安耕鑿女子雅慕節義殉夫者接踵
亂離之後此風蓋稍息矣夫化於姬德則閑田而興讓習
於嬴徹則相擊而反唇政教之移人也如是夫

黃佩蘭曰明丹城張翼明侍郎紀蒙令王公伉德政於所
謂移易風俗者蓋鑿鑿言之余治渦三年其風俗習慣有
可以裁之禮者畧有數事一曰宗祠渦陽馬氏於清嘉慶
間創立宗祠王劉牛程繼起張魏各著姓近亦倡修祠之
議於祠內設自治會聯絡族誼所缺者教育設備耳大江

渦陽風土記卷十

禮俗

十

南北宗祠林立各附書院學田課族中子弟清代科名之
盛實利賴之余昔宰涇川曾目擊其事周禮太宰以九兩
繫邦國之民五曰宗以族得民蓋一縣巨室其耳目好尙
衣冠奢儉恒足以樹齊民之望而轉移其錮習建宗祠以
崇宗法實聚民強國之大本是宜於禴祀灌獻之餘舉所
謂族正族副者實求所以自養自教自衛之事則鰥寡孤
獨廢疾者有所歸水旱兇荒有所恃淫俗淫朋有所稽餘
小姓附之而人心益磐固而不可解語曰百足之蟲雖死
不僵謂巨室之關於國本也倘竟無詩禮以涵育之其流
弊更深於庶姓耳喪禮踵門謝孝風行江鄉其爲非禮前

人論之詳矣若爲縣境所殊異者曰翻棺材底士夫製壽器將成故舊以儀物享之蓋喜其成又祝其不即用也雅詩落室而詠斯干獻文子成室而晉大夫發焉落與發皆訓始古者製器能銘爲大夫九能之一夫陰陽一理樂其室之成而歌詠之頌禱之可也卽以爲器而銘之亦可也不然若趙邠卿之自爲贊詞司空表聖之賦詩酌酒以作達而寄興亦可也此俗之可進於古者也曰幪音馮孝帽子親喪未久多數同人爲之沽美酒治嘉肴公宴而醉飽之以止其哀而便作事名之曰幪孝帽子夫三年之喪人子之至痛也誰無父母誰非人子旣不以禮處人亦不以

禮自處展轉仿效以相率於惡薄苟且之途此則有心世道者所當視爲隱痛懸爲厲禁者爾詩曰凡民有喪匍匐救之弔客所以助舉喪也縣俗於喪者之家搏黃土爲犧牲載紙幡先導從者輒數百人數十人爲小隊號呶嗶啻主人窘於應付某公歸葬母計番日欸賓弔者不受部勒扃圩門則踰垣紛至某公登埤不得已以槍聲恫喝之弔者始踉蹌去今此風或少殺矣民之失德亦風俗之憂也至婚姻之變相有早訂而後悔者有以妻作餌以漁利者亦有旋嫁旋逃踪跡詭秘者此風渦地最盛要皆辱人賤行中卜之士咸非笑之若夫夫妻脫輶女父兄糾衆示威

甚則雉經以殉莽浪之夫往往誣爲故殺報復毆辱輾轉

仇訟釀命傾家冥不知悟

縣人王騰階女適某家自縊死

來謝罪遍尋騰階不得乃扁靜室作羞澀不敢見人狀繼而言曰騰階教女無狀今謬以短見死貽夫家憂余罪何可追乎汝等勿牽率重余咎也先正典型倘乎邈矣夫狡童惡姑凌虐原無可恕乃

災來无妄實亦有因婚媾以致寇者女學不昌其流弊一

至於此非小故也語云病革而委之庸醫比之不孝不慈

未聞聽於神者也渦俗迷信巫祝病輒驚以爲祟禳謝驅

逐舉家惶然瀕危不悟於小兒此風尤熾余是以有醫葯

研究會之設噫嘻危哉日用飲食之間出於禮即入於刑

乃父兄之教不先子弟之率不謹縱情所之而不知循禮

渦陽風土記卷十

禮俗

三

以爲防甚且朋比講張以爲奸幻者社會情狀所由愈演

愈惡也曾文正之言曰風俗之厚薄奚曰乎自乎一二人

心所嚮而已民之生庸弱者戢戢皆是也有一二賢且智

者則衆人君之而受命尤智者所君又衆焉此一二人之

心向義則衆人與之赴義一二人者之心向利則衆人與

之赴利衆人所趨勢之所歸雖有大力莫之敢逆旨哉言

乎

禮俗之編次既定客有疑之者曰禮時爲大今無禮而議

禮且援及前代何也曰聊勝於無耳子不云乎周監於二

代所損益可知也監於已往神而明之可也使由而不使

知之亦可也且禮之於民猶菽粟之與生活也新穀未生
迸舊穀而以餒死可乎客曰庶人之不能備物將奈何曰
啜菽飲水盡其歡旋葬無槨盡其哀斯之謂禮禮云禮云
備物云乎哉客曰是皆然矣然國家方憂累卵今之志士
羣致力於兵戎實業以求生存於兢爭劇烈之世而猶恐
失之子顧萎萎以禮之說進不亦遠乎且渦俗強悍相染
成風不知張樂行牛師秀之倫亦可賦茅鴟以化蒼鷹否
曰善哉問也夫亂之初生蓋必有所以然之故慘莫大於
厝火於積薪拙莫甚於揚湯以止沸君子之道造端乎夫
婦及其至則天之所覆地之所載凡有血氣者莫不尊親

渦陽風土記卷十

禮俗

十三

中庸張皇幽渺而識者以爲贊禮之極辭故壞國敗家亡
人必先去其禮不及百年而爲戎低徊伊川蓋早有啜其
泣者矣春秋之世士大夫之知禮善說辭者常足以服人
而強國况漸民以禮處則敦醇樸之俗出則爲節制之師
彼淫靡之鳩毒物質之酷烈當之輒靡又何憂佩犢飲羊
之瑣瑣者哉漢不危於鴻門滎陽而危於諸將之拔劍擊
柱中華民國不危於列強環伺伏莽竊發而危於四維之
不張故今之懸蕤於野外者勿寧蹈叔孫之陋實不忍效
魯二生之迂也